

## Ess gibt immer was ze streite

Om Sunndaachowend habb ich uff de Terrass gesetze unn habb in moi Beem geguckt. E Omsel hott gesunge, von de Kelp her habb ich enn Guckuck rufe heern, unser zwaa Meisjer hawwe abwechselnd ihr Junge gefüttert unn koo Fluchzeuch weit unn breit. Uff oomol klingelts Telefon unn enn gude Freund hott mich aus de Stadthall oogerufe. Honnes, hotter gesacht, die Umgehungsstroof iss gekippt. Dess wollt ich derr nor saache.

Ich habb mich ferr die Auskunft bedonkt unn habb abgedruckt, unn in dem Aacheblick klingelts schunn widder unn unsern ahle Kumpel Hubert war droo. Ei Hubert, habb ich gefroocht, bisde in Flerschem?

Nein, hotter gesacht, ich rufe von zu Hause aus an.

Ei wie iss danns Wedder bei eich im Norde?, frooch ich.

De Hubert druff: Wir haben viel Wind, wie immer, aber ich denke es beginnt bald zu regnen, und den Regen können wir gut gebrauchen, sonst werden die Lebensmittel zu teuer. Aber weshalb ich anrufe: Wie ist denn eure Wahl heute ausgegangen?

Hubert, habb ich geontwort, ich waaß noch nit vill, nor dass ich grad oogerufe worrn bin unn geheert habb, dass die Umgehung gekippt iss.

De Hubert war iwerrascht. So, das hätte ich nicht gedacht. Oh jeh, das wird am nächsten Sonntag wieder hitzigen Diskussionen zwischen euch dreien geben, nicht wahr?

Du Hubert, habb ich gesacht, dess glaab ich nit. De Schorsch, de Karl unn ich hadde uns vor e paar Woche zimmlich gestritte – du waaßt doch wies iss, der oone moont su unn de onner moont su, unn deshalb hawwe merr ausgemacht, dass merr dess Thema nimmi uff de Disch bringe, jeder soll mache unn wähle wasser will. Außerdem hawwe merr ausgemacht, dass jeder soi Entscheidung ferr sich behält, nor dass merr wähle gehe, dess hott ferr uns festgestonne. Unn seitdem hotts doodriwwer koon Streit mehr gewwe.

De Hubert hott doodruffhie gemoont: Na ja, es war ja auch eine geheime Wahl, dann will ich auch nicht wissen, wie du gewählt hast.

Ich saach: Dann dets nit long dauern unn du dets dess emm Schorsch unnem Karl erzehle. Geheim iss geheim! Awwer was onnerst: Mir hawwe uns gedenkt, wenn merr uns long genuch streite, dann kriehe merr richdisch Krach. Waaßde, wie merr geheert hott, solls den in monche Familie gewwe hawwe, doo hätt de Sohn mettem Vadder unn die Fraa mettem Monn sich so gestritte, dass sich ferr e Weil aussem Weech gehe misse. Unn monche Freundschaften sinn uff oomol koo mehr. Naa, naa, so weit wollte mirs nit kumme losse.

Doo moonder: Da hast du Recht, Hannes. Aber wenn das so ist, dann gibts zwischen euch ja gar keinen Streit mehr, oder?

Ei sicher, habb ich zur Antwort gewwe, unn iwwer e Thema, was uns noch dreißisch Johr beschäffdische dut, die Klimakatastrof.

De Hubert hott erstaunt gefroocht: Dreißig Jahre? - Hannes, dann seid ihr alle über hundert!

Ich habb vor mich hiegelacht unn habb ins Telefon geknorrt: No unn?

Eiern Honnes